

lendos cum Deus iussisset, nec Israëlita mandatis omni ex parte obtemperassent, contentique fuissent non solum ex iis tributa colligere, sed & aliquando etiam cum iis conubia facere, eorumque Idola colere non renuissent. Iratus in Israëlitas Deus permisit, ut nunc his, nunc illis ex Chananæorum Gentibus, & vicinis Populis aliquoties Israëlita servierint.

Servierunt Regi Mesopotamiæ Chusai Rafathaim, per annos octo. Sed eum percussit Othoniel filius Cenez nepos Caleb.

Servierunt Eglon Regi Moab per annos octodecim. Eum Aod qui utraque manu pro dextra utebatur, cum sica in cœnaculo suo confodit, & Moabitas percussit.

Servierunt Regi Iabin per viginti annos. Regnabat ille in Afor, habebatque nongentos falcatos currus, & Ducem sui exercitus Sisaram. Quem Debbora Prophetis, accito ad belli munia obeunda Barac Alcinoës filio, vicit, eumque fugientem, & in tentoria Haber Cinai latitantem, Iahel uxor Haber Cinai, cum clavo tabernaculi in cerebrum percussit dormientem transfixit.

Servierunt Madianitis per annos septem, donec Gedeon semel, iterumque, tum & tertio à Deo vocatus Madianitarum centum & quinquaginta millia exercitum, cum trecentis tantum viris, iisque cum tubis, lagenis, & lampadibus armatis in fugam vertit, & à Jordanis transitu prohibitos per Aferitas, Nephthalitas, Manassitas, & Ephraimitas percussit, eorumque Reges Oreb in Petra Oreb, & Zeb in torculari Zeb interfecit.

Servierunt Ammonitis per annos octodecim, donec Iephthè, Dux Israëlitarum factus, eos maxima plaga affecit. Vir laudabilis si non votum temerè factum absolvisset, & si non Ephod conflasset.

Servierunt per annos quadraginta Philisthæis, quas Samson filius Maniæ multoties, & variis modis afflixit. Acalonitis triginta vestibus & vita spoliatis: segetibus, vineis, & olivetis eorum incensis, mille fortissimorum in maxilla asini occisis; omnibus Principibus Philistinorum, & tribus hominum millibus secum obrutis.

Servierunt iterum Philisthæis Israëlita semel atque iterum ab ipsis percussi: & arca Domini capta est, cæsi duo Heli filii, & ipse cadens è sella occubuit. Sed Philisthæi propter arcam Dei inter Idola sua positam alii post alios castigati, eam ad Israëlitas cum muneribus remisere: & sub Samuële liberati sunt Israëlita de manu Philisthim: iis ad locum, qui lapis adjutorii vocatus est, humiliatis.

Samuële senescente, & Samuëlis filiis ad avaritiam declinantibus, populus Regem petiit, qui à Deo datur Saul filius Cis.

Saul filius Cis Ammonitarum Regem Naas, qui ex civibus Galaad oculum dextrum eruere volebat, in fugam convertit. Sed Samuële non expectato, cum holocaustum ipsemet obtulisset, ut Philisthæis occurreret, & iterum cum iussus esset à Domino ut deleteret funditus Amalec, eorum tamen regem Agag,

prædamque opimam reservasset, à Domino reprobatus, & David filius Isai fratrum suorum minimus, in regem unctus est.

David inermis Gethæum Goliath gigantem, armatumque, lapide è funda excusso, in terram dejecit, & capite præciso occidit: sed ob eam victoriam mulieribus Davidem plusquam Saul laudantibus, Saul malo in Davidem affectus animo, eum multoties perdere voluit: cujus malevolentiam evitans David, fugit ad Achim filium Mahoh regem Geth; ad Speluncam Odollam, ubi fratres & amici ejus conveniunt; ad Maspha, quæ est Moab; in Ceilam, quam à Philisthæis liberaverat; in desertum Ziph; in collem Hachila, in desertum Bahon; in speluncam Engaddi; penes quam oram chlamydis Saul se persequentis abscondit, iterum in desertum Ziph, in quo Saule ad collem Hachila castrametante, illius hastam & schyphum nullo sentiente David abstulit; iterum ad Achim regem Geth, à quo Siceleg urbem obtinuit, quam se absente statim ab Amalecitis (dum Philisthæi cum Israëlitis pugnant) captam, incensam, & direptam reversus David recuperavit, recepta omni prædâ, & ex æquo inter suos divisa. Saule interim, & Ionatha, & filiis Saul à Philisthæis in monte Gelboe occisis.

Saule mortuo David consuluit Dominum, & ascendit in Hebron: ubi tantum cum tota domo Iuda regnat annis septem, & mensibus sex: dum Isboseth Saulis filius super totum Israël dominatur: ipso autem à suis occiso solus regnat David super Iuda, & Israël.

David Iebusæorum reliquias ejecit è Iebus, quæ postea Ierusalem, habitavitque in arce, quam vocavit Civitatem David. Philisthæos bis vicit in Baal-Pharasim, & in valle Raphaim, & cum tertio eos vicisset, tulit frænum tributum de manu Philisthim; percussit Moab, qui & factus est Davidi serviens sub tributo; percussit Adarezer filium Rohob regem Soba, & posuit præsidium in Syria Damasci, quæ & facta est Davidi serviens sub tributo. Sic & Amalec, sic & universa Idumæa, in qua custodes posuit, statuitque præsidium.

Hanon Ammonitarum rex servis David, qui ad eum consolandum de Naas patris sui morte missi essent, mediam barbam rasit, vestes ad usque medias nates præscidit, eosque sic contumeliosè habitos remisit. Statimque ex suis, & ex Syriæ regum in Rohob, in Soba, in Istob, in Macha copiis exercitum armavit, quem Ioab Princeps militiæ David semel atque iterum devicit: eosque David severissimè punit. Reliqui pacem cum ipso fecerunt, & ei servierunt.

David circumvicinorum omnium Populorum, Regumque victor, Beth-sabée uxorem Uriæ Hethæi mulierem formosissimam lavantem se vidit, concupivit, cum ipsa adulteratus est, & cum adulterio homicidium Uriæ in obsidione Rabbath superaddidisset, & Beth-sabeem in uxorem accepisset, Dominus per Nathan Prophetam eum monet delicti